

龔山續集

皖桐方文爾止著

壻繡水王槩安

七言今體

寄懷沈詹生徵君

以下壬寅年作

君去蘭江十幾春歸來疑是爛柯人
龐公足不履城市陶令兒皆習隱淪
往事傷心歌黍稷今秋屈指訪松筠
雖然避客難辭我我亦淮西老逸民

宋其武少叅枉顧舟中兼送酒資謝之

先公先子同門友詩酒流連氣誼淡
我復與君齊齒髮才難如命各升沉
昔游燕市曾題句今泊龍河又惠音
分俸雖微情自篤結交元不在黃金

送陳二如鄉貢北上



虞州歸艇泊江灘老友相逢分外懽今夜西窗重剪燭
來朝南浦卽登鞍文辭瑰異人爭識狀貌魁梧亦好看
此去金臺有奇遇知君定不是微官

李條侯尊人雙壽

人間怙恃罕雙全况是同登大耋年偕隱允爲希世瑞
延齡不藉養生篇慣邀鄰曲斟春酒閒看兒孫種水田
安得移家傍吾友時時地上接真仙

丘曙戒侍講招飲話舊贈此

歷城聞爾謫瓊州瘴雨蠻煙天盡頭只道微官淹海嶠
那知隔歲返田疇新詩絕勝緣經險舊友重過勸乞休
頽仰之間多樂事垂竿淮浦復何求

畱別徐子星給諫

菰蒲風冷雁初飛我去長淮君正歸故舊相逢情自篤
關河有酒願無違頻年畫省多封事此日青山暫息機
野老卜居桃葉渡平安煩與寄柴扉

送從孫有懷歸江南

汝向洛州省婦翁歸船恰與外家同停橈且醉南池酒
策蹇仍觀闕里風遂有詩篇超物外爲將書信寄山中
汪生欲訪幽棲處到日相攜問桂叢

內姪汪策以與有懷同舟

登岱不得觀日悵然有作

前年曾上日觀峯夜半披衣見赤龍隔歲重來梁父道
罡風先折大夫松補尋石屋雲偏晦再躡天門雪已封
可見勝游元不易必須旬月始從容

謁魯兩先生祠

一爲孫明復一爲石守道石乃孫弟子故側坐

霜晨徐步入荒祠魯兩先生儼在茲高坐抗顏如講學
欽容侍側爲尊師白頭纔著春秋論青史猶傳慶曆詩
却訝當年何坎壈豐碑讀罷繫人思祠中有施愚山碑文

送兄子竹西歸里

幕府相依十五年論交誰似此纏綿雲天高義應難別
烏烏私情汝自牽霜月暫須歸子舍花時又可促征鞭
白頭健飯休多慮羣從爭推負米賢竹西爲澠林李先
生客凡十五年今

以母老
辭歸

我老移居向白門山田無以繼饔飧囊書每赴故人約
刻骨難忘知己恩澠林也與爾燕齊頻聚首言歸淮泗各
傷魂餘年安得同巖壑朝夕婆娑松桂根

題劉永錫將軍畫冊

官舍何當入畫圖主人情況自高孤登壇耻作糾桓態
閉戶寧爲博雅儒蕉葉題詩書亦妙槐陰畱客酒頻酌
眼中多少乘軒者得似劉郎更有無

贈岳鎮九進士兼懷趙無損

前年曾過汶陽城特地城南訪趙生同舍有緣多載酒
思君未見最含情相逢闕里歡如故却望長河凍欲平
僕馬催人容易別今宵痛飲至鷄鳴

寄懷陳襄雲處士

六年書札不相聞但遇同鄉必問君傳說病身羸轉健
算知賢子長能文高情玩世歸巖壑浪跡憐予逐水雲
乞寫一枝蘭菊影草堂朝夕對清芬

宿遷晚泊

有客南歸遇順風黃河北岸駐征篷孤城隱隱寒原外
三戶蕭蕭秋水中獨把閒杯對舟子憑將往事問漁翁
伍胥項羽今何在落日長淮望不窮

伍項俱下相人下相即宿遷也

送郭鞏之歸山右

何物微官絆此身六年流滯大江濱曾經刑獄幾為鬼
歷盡風波始是人歸路獨攜黃髮子倚門猶有白頭親
秋田釀黍堪娛老莫向燕臺再問津

贈鄭梅翁

兄弟同心世所難君家獨有古人歡卅年養母不分產
兩室生兒無異觀負米自能炊玉粒藏書亦可抵金丹
相期共作耆東隱慎勿蒼茫憶築壇

鄭方應武舉

送周元亮使君之任青州

少年出宰古濰城一劍曾當百萬兵遂有蘭臺膺帝
簡至今蓬海誦公名星輅重指穆陵路畫舸將為春水
行獨惜山東風景異憑高望遠不勝情

元亮起家濰令時山左踈曠所

望無堅城濰被圍久元亮以一書生乘障親集鐵其身城得保全濰人至今稱之

魯國纔歸歲序殘聞君元旦發江干尚無薄酒旗亭醉
翻荷嘉招雪夜歡總為平生好風雅不嫌賓客半寒酸
岱宗闕里吾遊慣只恐瑯邪興未闌

寄任玉成御史

以下癸卯年作

舊京人物凋零盡江北猶餘獬豸冠肥遯自應藏土室
浮榮未必勝漁竿梅花詩索山僧和竹葉杯從野叟乾
却笑門前來往客不辭風雪跨征鞍

贈智劍大師

稿師出世大英雄麻城梅稿木葉百萬家學道故云師與同鄉道亦同

少學兵書三府辟老歸佛法萬緣空蕭蕭白髮秋霜後

黯黯青燈夜雨中回首江淮渾似夢圍城屢次建奇功

師曾為史閣部
參軍屢破賊

雪後東從子象山時寓鷲峯寺

春雨霏微已不禁那堪積雪蔽園林遙知荒寺擁爐客

定學寒蟬抱葉吟病取杜詩為藥餌閒看文冊當登臨

來朝挈伴衝泥出溪上梅花試一尋

答王無異辛卯見懷四首

十二年前客舊京曾將嘉句寄山城尺書無便酬知己

下甲相思望月明昨歲渡江纔會面開春移寓更多情

旃檀咫尺通桃葉日日溪邊攜手行無異往寓僧寮與
予草堂相望日夕

東園往昔杏千株樓閣陂塘似畫圖亂後可憐成廢圃

花時不忍再提壺尋春且向長干道縱酒何妨野店沽

正學祠堂堪痛飲忽瞻遺像又嗟吁草堂地近東園曩
日杏花最繁予與

無異猶
及過賞

六朝名蹟徧江東牛首棲霞更不同遊覽人皆嫌遠道

追攀君欲趁和風攝山窈窕神仙窟天闕嵯峨造化功

結伴便應乘興往暮春臨別復忽忽相訂有天闕攝山
之游皆以事阻未

玉女頭盆山下居亭名獨在意何如雲霄祗合仙人馭

石戶休勞徵士書且與蘇耽同避世豈惟支遁解憐渠

老夫他日遊西嶽定訪胎禽到爾廬

送何第五之任廣州兼懷施尚白周計百

東風貽蕩柳條新君去番禺作逐臣雖入蠻鄉猶少瘴
况司鹽稅未全貧江干一路山如畫篷底孤吟句絕塵
想過蕭灘與章貢憑將尺素報情人

夜坐

破屋寒燈昏復明紙窗獨坐到深更一杯濁酒有妙理
四野荒雞非惡聲少日功名空自許老年勛業竟無成
灰心只合歸禪悅莫向人間歎不平

潤州訪張季昭陳尊已李木仙諸子

不到京江十五年江城朋好尚依然屢經兵火家皆破
盡改鬚眉意可憐握手但增新涕淚賞心猶記舊詩篇
山游幸喜爲同伴僧舍何勞費酒錢

偕周兼三潘江如吳襄宗皮以立游焦山

丁卯橋邊花正紅看花日日與君同天晴便有焦山約
寺古猶餘桂樹叢龍鼎自周年更遠雀銘疑晉字何工
嘉游亦覺江神喜朝送南風暮北風

姑蘇道中

平生最愛吳江水狹港斜橋處處通漁艇載妻兼載子
艸衣禁雨又禁風湖梢密樹知農屋林際高旛識梵宮
安得攜家來此隱時將煙棹入空濛

登虞山

客居卑溼又塵氛獨上山椒望海雲亂草久荒虞仲墓
高松還覆子游墳土中埋沒尋殘碣石上依稀識舊文
老子祠堂最高曠流連不覺至斜曛

別錢牧齋先生

我客虞山暑正煩十朝九扣先生門持杯不惜荔枝酒
穿徑如入桃花源古人命駕輕千里烈士酬知重一言
臨別依依更回首相期冬月再過存

休夏

家在青溪古寺東閉門休夏與僧同參差水竹不愁暑
爛熳園蔬未覺窮况有閒書消永日因之高枕御涼風
一盃冷飲猶嫌熱繩繫銅餅墜井中

喜鄰人見訪

園叟溪翁比屋居葵邊抱甕柳邊漁顛毛有雪雖衰矣
土銼無煙常晏如從未開門延俗客偶朕拄杖過吾廬
蜀膠糲飯休推却仍是君家魚與蔬

艸堂

艸堂何處避炎威堂背新開兩扇扉南北氣通風力大
東西樹接日光微簾紋似水容高枕鼻息如雷撼薄幃
夢裏忽驚山雨至晚涼纔著一絺衣

白屋

白屋三楹覆白茅青溪一帶似青郊門前種圃多蔬甲
牆外編籬長竹梢守拙自無塵事擾遺榮猶有俗人嘲
鄰翁善數通河洛筮得山風第六爻

上九日不事王侯高尚其事

立秋日紀伯紫見訪草堂

是年伯紫遷居儀真

君去真州五月餘江鄉雖好歎離居交游已倦惟扃戶
父子相依更讀書身病關心來故國雨涼徒步到荒廬

不勝契濶憑杯酒况是西風落葉初

送吳不官還六合

君家震澤兩山中招隱無非桂樹叢何事往來如社燕
可憐飲啄類江鴻頻游故國秋多感間出新詩老更工
自笑幽蓬能歛性白頭猶未就幽蓬不官賦歛性就幽蓬詩逢人索和

喜從子還青少府見訪感舊

筮仕無端去極邊關西佐郡又三年程書只是多吟卷
飲水何曾問俸錢家轉貧于未選日老仍歸種故山田
等閒不冝游城市高臥楊灣意迥然還青官後甚貧窘揚灣迺還青舊居

今重事南畝也

羣從誰如爾一心却為姻亞更情淡時危每歎孤生竹
道遠猶分數餅金此日青溪重命駕方秋白雪已盈簪
安能二老居鄰接晨夕披衣共苦吟

聞張子下捷音有贈

桃葉溪南秋水生荒園積雨喜初晴老夫懶問門前事
童子喧傳榜上名鄉里推君才獨絕尋常好我意非輕
若今天路皆如此無復崎嶇嘆不平

與紀伯紫同舟至儀真而別

詩成愛與爾商量所恨離居各一方何幸秋江同道路
不嫌寒雨滯舟航連宵始盡篋中集明日重登君子堂
無奈真州又分手淮南煙樹鬱相望

揚州九日同王貽上司理登蜀岡觀音閣即迷樓故址

蕪城西北有高丘當日繁華逐水流月下游魂來煬帝
塚邊衰艸失迷樓山川只是僧長在風雨何曾客不愁

恰喜新晴逢令節憑闌一望思悠悠

送黃心甫游青州兼懷周元亮使君

何事殘秋客廣陵與君同寓意飛騰連朝赴飲鳴雙屐
每夜攤書閃一燈白髮雖多身轉健青州獨往興堪乘
侍郎亦有山東約我欲相從恨未能

從兄坦菴先生招飲寓齋看菊率成二首

白髮新從紫塞還淮南處處是家山高秋濟水先停權
長夏蕪城又掩關自有真詩娛老眼不須多酒破愁顏
此邦雖好兒孫遠歸去青溪明月灣兒客列溝而子姪皆家白門故欲共

也歸

猶記霜天入舊都時時酒脯慰窮途榆關一去腸堪斷

棣萼相望眼欲枯舟泊黃河驚會面益移白菊喜提壺

從來小謝論詩合為我重題王子圖子與陶杜白三公皆王子生有四王

圖子

白母八十壽詩孟新仲調之母也

三十年前客舊京與君兄弟定平生登堂曾拜茅容母
劉薦能成陶侃名佛閣誦經持殺戒孫窗拄杖聽書聲
世人不識滄桑理獨有麻姑眼最明

漫興

半世飄零東復西白頭歸隱舊青谿功名盡付一盃酒
祿命仍餘百甕齋饑不能齋惟戒殺客無可饌又烹雞
時時勸我中廚婦何必盤餐定整齊

與吳賓賢同宿汪舟次齋頭有贈

秋窗曾讀陋軒詩海岸遙憐冰雪姿趙壹頗為鄉里笑

虞翻猶有一人知今宵同夢何其愜明日離羣重所思
肺病三年無藥餌苦吟切忌苦寒時

章縫村夜宿

又去南池向竟西路經嘉鉅夕陽低章縫自覺村名古
稼圃當爲儒者棲逆旅雖荒聊繫馬吟人方寢便聞雞
來朝想見陶丘宰索飲先拚醉似泥

贈韓五仲連

前太史芹城先生之弟也

家難如君不忍陳江鄉何處可垂綸欲游洱海艱資斧
先向陶丘訪故人官舍相逢霜氣冷旅愁又見歲華新
天南萬里終嫌遠酒島詩崖且卜鄰

初度有感

定陶馬正誼署中合
嗣思公故公同飲

以下甲辰年作

竹馬嬉游如昨日俄驚五十又三年井泉不食吾無恨
滄海橫流劇可憐東魯近來頻作客南都歸去始求田
家人此日遙相憶知在風塵何處邊

臨邛待客情雖厚司馬干人願未諧開歲尚斯之竟樂
歸心無夜不秦淮也知學稼山山稔爭奈謀生事事乖

況對崔悽好兒子當筵尤愴侍中懷

李侍中神儻云昨
見崔悽兒瞻遂爲
後來第一我獨
無此令人傷懷

得馬壻永公書

片札傳來自蚤春勸子歸隱意何真祗緣牛首買山計
敢惜馬蹄行路頻乞食且從謝仁祖起廬還待却嘉賓
今秋倘遂田居願誓不出門干謁人

送孔士崇之任宣平

黃河南岸雪初融君渡黃河便不同一路山川如畫裏

三春花鳥在舟中，蠻鄉只合彈琴治家法。仍傳平準風，我有故人方佐郡。憑將尺素寄甌東。時稽叔子爲温州司理

留別母曹州承乾

刺史風流天下聞，春城留客意慇懃。香醪不惜千鍾醉，廉俸何當兩鑑分野性。疎狂應恕我窮途，沾潤敢忘君他年。五馬來南國，漁釣重披江上雲。

送趙月潭太史歸無錫兼懷牧齋先生

桃葉渡頭鉏小圃，鷺峯寺裏寓高人。幾回相訪無多路，忽漫言歸各損神。江國風濤渾朔氣，家園花鳥正陽春。開尊若見虞山老，爲說新秋再問津。

出太平門望後湖

玄武湖邊風日悽，行人策蹇舊長隄。刑曹撤後兵添塚，圖籍空來菜作畦。豈有荷花隨水長，尚餘蒲艸入煙迷。春游至此腸堪斷，况復頻聞杜宇啼。

棲霞寺訪竺菴禪師覺浪大和尚首座也

蕪江相遇共登臺，曾誦葡萄好句來。十六七年流水過，兩三四處道場開。攝山重建本師塔，弘法爭推絕世才。我亦遠公門下士，自慚白髮老塵埃。

吳饒州見末杜駕艸堂出其近詩相質因及孟貞

與治有感而作

老友新歸自粵東，重過南國訪幽蓬。十年仕宦頭應白，千首詩歌興不窮。昔好風華猶習氣，今知淵雅是宗工。傷哉邢顧俱搖落花下，提壺誰與同。

喜晤岳聲國進士

命口續集
季子祠前樹拂雲停舟相訪寂無聞那知茗水先爲客
纔入孤城便遇君篤念舊交勞夢想流觀新句絕塵氛
飢甦況有烏程酒百遍過從不厭勤

嚴蔚宗孝廉招飲有贈

潮音橋畔水粼粼書掩柴扉迴絕塵何事嘉招無別客
祇緣微尚獨相親頻年破產休嗟嘆此日全軀合隱淪
不見披裘與賣卜古來俱是姓嚴人

送張則之歸京口

漂泊茗溪四五句老懷偏與故交親不辭酒醜過從數
況有詩篇唱和頻忽漫言歸當盛暑雖非得意亦逢春
若翁壽考兒英妙自是人間介福人

王徵宣孝廉招集遙青書屋并送其游福州

先後淮陽作寓公詩篇流布意潛通班荆直至七年外
招飲渾忘六月中舟遡雲溪尋古巷窗臨射圃納涼風
浮瓜沉李堪畱客炮鼈烹魚何太豐

聞說清秋游八閩同舟恰喜有詩人

徵宣與喬手五同往

山川奇

絕吟逾壯故舊歡然旅不貧節過荔枝休悵望霜迎蜜
橘更鮮新獨憐好友難爲別白雀黃龍且問津

湖州西北有白

雀寺黃龍洞

葉明府紫羽招游畚畫溪

陽羨餘干兩畫溪此溪清絕著湖西

宜興亦有畚畫溪而長興較勝重

雲無復干尋木孤閣猶殘百尺梯況有神仙爲令尹不
辭賓客共攀躋賦詩行酒淹長晷歸去河橋日已低

喜從弟漢士見訪

久客茗川黯自悲，搗來羣從稍開眉。百年過半同吾老，
二子連生覺汝奇。秋橘冬橙應有候，霜髭雪鬢不須疑。
江鄉歸艇催人急，也是藍田種玉期。

戒酒

酒以忘憂，昔所聞。況逢名酒，味清芬。興來每不論升斗，
病劇方知是斧斤。從此暮年，裁痛飲，卽當寒夜亦微醺。
操持漸久，渾忘却，便可長齋不茹葷。

題周計百看山樓

鬱孤臺下水交流，霜月曾經此地游。痛飲難忘司理署，
高吟重起看山樓。開尊醺集誰能賦，佐郡廉平百不憂。
只有些些惆悵事，煙波未遂五湖舟。
煙波吳女名計百，定爲妾而爲豪強。

者所奪

寄懷王涓來侍講

都門別後少音聞，無限交游獨憶君。準擬越來成會面，
那知兵過使離羣。還鄉定出龍江路，枉駕期看鳩閣雲。
不則吾當相就語，霜天波月白紛紛。

送王望如補官北上

王郎弱冠逢仙客，手授丹書理數兼。自信功名當遠大，
無端禍患亦安恬。年華雖艾仍如少，時論方推寧久淹。
努力驅車向京國，蘭臺芸閣不須占。

送周雪客省侍之青州

將與望如同行

春去齊州秋始還，冬晴又指穆陵關。思親敢謂征途遠，
結伴偏逢老友閒。月下同舟渡江水，沙邊立馬看雲山。
知君行李無多物，只有新衣五色斑。

喜從孫董次見訪艸堂

爾去靈巖結好因村居雖僻遠器塵身閒努力為詩伯

年少甘心學逸民交有縈河真莫逆縈河吳超士也才與董次偕隱

如明圃更無倫明圃董次親叔子雷也詩最妙過江每念金山老把酒

看花日幾巡

哭程少月山人

日中猶向艸堂來月下還同野衲盃是夕三更忽奄逝

何曾一念稍徘徊可憐知命能安命程精于五行家言況負詩

才與辨才不肖死于妻子手故將冤鬼傍蓮臺先是程每家居

是日就宿報恩寺遂卒

往歲江淮賣卜行布衣端坐傲公卿年來獨喜長干寺

都下爭推季主名日有千錢惟縱酒家無斗粟亦忘情

兒年正少書能讀只恐孤寒難治生

與子貧交十六年白頭相對更惓然談言微中真奇術

義利分明亦大賢方擬入山謀共隱那知撒手遽游仙

達生順處應無恨獨使良朋涕淚縣

為陳俞公五十初度

雞籠山下是君家手種東籬十畝花性烈也同霜不畏

客來那惜酒頻賒昔參幕府多兵畧今返丘園收歲華

駟馬軒車易傾覆何如野老話桑麻

曹子顧秘書見訪感舊

猶記當年借盛生飲君谿閣話三更別來萬事滄桑改

老去重逢鬢雪盈却訝田居蒙吏議也知兒戲是榮名

雨花桃葉堪游賞買酒無錢空復情

寄懷五兄凝齋七十

任城官舍話終宵
來日登艫意寂寥
白髮那能事干謁
青山應不負漁樵
歸借令子田園穩
醉吐新詩壘塊消
脣壽定齊猿與雀
獨憐鴻雁碧天遙

寄懷許韻遠

二十餘年契闊情
不圖君上得班荆
乍看容鬢非當日
回想京華似隔生
握手那能淹野寺
揚帆便欲去江城
惟期獻歲來南國
斗酒雙柑聽早鶯

去京口之前一日杜蒼畧見過送以詩荅此

沍寒只合臥淡山
底事長江往復還
豐歲絕炊殊可異
殘冬乞食亦何顏
交游見爾貧逾甚
歎息干人老未閒
獨有平生詞賦在
歌聲金石動江關

爲梅杓司悼亾

自爾驅車入薊門
閨中思婦獨傷魂
盛年夭折雖由命
平日乖離亦少恩
角枕尚餘雙淚漬
紙窗空對一燈昏
外家兒女方孤幼
莫便先歸湖上邨

喜施愚山使君至卽訂棲霞之游

十月星輅過舊都
江亭一宿便馳驅
懷人不見書空寄
奉使才歸歲已徂
匆迫尚思游古剎
追陪必欲待潛夫
非君逸興誰能爾
忙裏偷閒世所無

同愚山登攝山頂

薄暮聽泉憩石橋
侵晨披霧躡山椒
長江一綫水初落
老樹千章葉盡凋
且就高僧談上乘
更尋殘碣認前朝
却嫌輿馬催人急
白日黃塵去路遙

立春日何第五招同愚山夜集兼呈令兄次德
卜築青溪少四鄰君家兄弟獨相親每逢好月思良晤
况復寒江來故人雪酒不辭今夜醉風花又見一年新
烏衣巷口多芳草明日重過是早春

除夕戲為數詩自一二至億兆共十九字

五十二年過半生人間萬事一無成孤懷只有詩千首
雙闕何曾見兩京四海八荒同戰伐二儀七曜也縱橫
運移百六兼陽九億兆同心想太平

人日飲從子邵村宅以下乙巳年作

前年人日草堂中別後關河路不同炎暑獨馳汾水北

癸卯六月邵村往山右 冱寒猶阻嶧山東是年子客定陶未歸 今春歸舍復

何恨竟夕持杯莫放空酒罷忽聞私歎息蕪城雷滯白

頭翁

天界寺訪笠山師

早春猶未出城南聞說梅開試一探不見嚴遵居卜肆

程山人少月去冬新歿 獨尋惠遠到伽藍看花無復當年興啜茗

聊為半日談爭得離家拋俗累香燈從此奉瞿曇

元宵書王元倬先生詩後

開春風雨雪全無列炬張燈徧九衢老我柴門何冷落

誦君詩句足懽娛才華豈獨高楊並高李迪楊孟載 心事惟同

謝鄭符謝舉科鄭所南 深夜北窗猶較閱今年元夕不空徂

哺雛軒獨坐

谿邊小圃竹間樓且喜今春未出游七字苦吟宜暫輟

六書精義恣冥搜飢寒何足關人慮著述真能解我憂

却憶去年正月裏定陶騎馬到曹州

正月晦日喜姚六康孝廉見訪

老大偏逢節候驚三春花鳥倍關情
嘉辰安忍閉門坐野衲相邀出郭行
忽報良朋來嶺海况攜仙藥饋柴荆
一杯且共今宵話明日江頭送遠征

送姚六康謁選北上

浮雲游子各天隅十載重過悲喜俱
聞說浚山多猛虎何如強仕得飛鳧
長齋豈復營家計薄祿惟應散酒徒
但願江淮名勝處故人舟楫不艱虞

二月初五日雨

自冬徂春一百日上天不雨下民咨
薄田既累那禁旱公稅猶逋敢望私
夜聽茅檐聲滴瀝曉看花檻色榮滋
再添三尺陂塘滿直到農家浸種時

倪閣公四十初度

倪生弱冠佩瓊琚屈指爲郎典石渠
豈料壯懷猶寂寞每逢初度却欷歔
古人學道尊無比亂世安貧富不如
况爾才名已流布王維詩句李邕書

施愚山書來却寄

寒風蕭瑟去江涯除夕蒼黃始抵家
春酒人爭浮栢葉閒情君獨咏梅花
兒婚已畢向平願期迫難淹博望查
想到署齋新誥展鳳冠魚帔更堪誇

愚山新受封特爲其夫人製冠帔

吳弘人見訪草堂

經過笠澤正拏船欲訪良朋興索然
稍喜芳春重聚集生憎俗事又拘牽
偶閒便約來谿舍屢空何繇得酒錢

惟有新詩共欣賞夕陽相送短籬邊

上巳日湯巖夫王左車黃俞邵程子介馬永公王

安節次第見過因畱小飲賦此

春色三分減二分無端風雨歎離羣忽聞好友來晴圃
且坐荒齋看水雲研究六書良足樂縱橫衆說未前聞
蘭亭修禊尋常事莫羨當年王右軍

雨後閒步

城居最喜是春陰風雨全無俗事侵把酒量從中歲減
著書識到老年淡貪看細字頻傷目閒步荒園一散心
忽見柳塘新水漫興來不覺又微吟

三月十九日作

年年此日有詩篇篇什雖多不敢傳鴟亦知時宜閉口

寓因沈痛必呼天銜哀只似髻初斷迸淚其如眼欲穿
江上春陰更淒苦蒼茫白水浩無邊

過水草庵弔黃海岸先生

靈谷西邊銅井東昔賢於此化長虹平生修證方成道
大事因緣豈是空野老題詩紛滿壁行人下馬仰嘯風
從今水草菴前路直與燕山柴市同

三月晦日送黃子捷歸建昌

芳晨出郭送春歸又送歸人指落暉旅食傷僧惟有粥
窮年作客尚無衣世情誰恤忠臣胤吾道寧安季女饑
努力山中勤稼圃不嫌葵菽奉慈闈

送竺庵禪丈還南嶽

攝山溪處好煙蘿正藉談經柰別何雲樹不忘衡嶽寺

風帆直溯洞庭波五峯當戶塵氛絕六月休糧著作多
回首江東師塔在明年春水復來過

王左車招同湯巖夫龔半千楊古度程子介飲莫

愁湖上

郊居雖僻近名湖自與城中闌闌殊飽食一生惟笋蕨
出門數武即菰蒲客來治具何其盛酒罷登樓不用扶
聞說盧家多好女至今還有莫愁無

同王阮亭祠部游牛首山

舊京山水探將徧佛窟幽棲尚未曾牛首古佛窟寺臨
祖堂古幽棲寺
去江關時迫促不辭炎暑興飛騰曉穿石徑瞻雙闕夜
坐松樓對一鐙却訝前人碑碣少待君游記勒高層阮亭

有金陵山水
詩記十篇

送彭旦公之任丹陽

仕宦今無一可為商量只有廣文宜身閒不廢尚書業
彭以書
經名家祿薄長稱秀彥師况近家園將壽母每叅江郡
得新詩故人舟楫頻來往方物從君取料絲丹陽產
料絲燈

寄懷陳襄雲

聞有詩篇寄秣陵三年夢想見何曾偶來舊友傳山信
似坐秋窗對雨鐙愧我風塵猶襍穢多君林壑絕炎蒸
欲遊滄浦當經皖爭得江樓一共憑

揚州東李長文使君

其太翁方病謝客

廣陵城外菊花時高館張鐙聚所知汎愛能容霜鬢客
多情不吝草堂資重來此地炎威熾三過君門典謁辭
稍待白頭翁健飯新秋芳徑一論詩

六月十七夜社集王仔園齋頭賦得聽詩靜夜分
舊京風雅蕭條甚忽覩蕪城氣象新日日水邊多勝事
家家樓上有詩人客來長夏尊偏滿話到中宵意轉親
敢謂知言似匡鼎羣公亦覺解頤頻

壽郝羽吉母

男兒志節且艱辛况是閨房孱弱人州郡同時皆遇敵
兵戈滿地獨全身養雛成鳳文章著剉薦為芻名譽新
眼底滄桑何足算麻姑重見海揚塵

送劉興父歸秋浦

爾去都門歛四年一官雖授尚屯遭閒游直出河汾外
沃野還思慶曆前久客邊城身小病將歸故里橐空縣
江干相見銜杯好愁殺秋宵又放船

訪蕭伯開新居

客裏移居最苦辛七年三徙更愁人此番水閣纔安穩
合與山妻共隱淪檻俯秦淮宜過夏樓瞻漢時不知春
同心獨有南陔老咫尺何妨索酒頻

九日登木末亭飲景公祠

新安方寶臣程子介

九日年年不冒晴今年九日最晴明兒童相率登高去
老子何妨挈伴行萬木全凋因世難雙祠重構見民情
皇圖霸業俱荒艸不朽仍歸烈士名

王壻安節以九日詩見貽走筆荅之

見爾來詩喜欲狂閒情冷韻獨蒼蒼祗疑寒瘦同郊島
不似公卿立廟堂亂世科名雖可厭少年富貴亦難忘

老夫自悔吟聲苦五十奇窮兩鬢霜

九月十五夜即事

一年月色今宵好偏是囊空乏酒錢霜氣初寒猶未肅
秋亭獨步不成眠醉鄉久曠因游輟織室長勤賴婦賢
幾欲拔釵吾又止來朝畱以繼炊煙

贈彭鍊師

昔年相遇狂禪客今日重逢老鍊師高議能通仙與佛
奇懷不廢酒兼詩久游河北多丹竈暫返江南尚黑髭
遂有門人爭館粲三冬且住莫淡辭

送谷語師游武夷

琢鍊堆邊秋海棠繁花亂藥贊公房

天界寺有琢鍊堆乃宗泐禪師苦吟

處人公居與堆近海棠最多 祇宜獨坐攤書好何事扁舟涉水長山指

武夷尋舊塔路經吳會履新霜明年亦有離支約共入

興泉得飽嘗

荔枝亦作離支出司馬相如上林賦

酬胡吉甫先生見贈之作

八十六翁猶未老新詩警策似中年黃昏更作蠅頭字

蕭灑渾如雀背仙望我生兒延祖澤知君學道本師傳

先生受業於先司農之門 今冬果遂商瞿願買酒何辭賣賦錢

哭林茂之先生

隆萬遺民今已盡尚餘一老在山隈年登耄耋復何限
晚際滄桑實可哀病眼塵昏雖似霧壯心火熱未成灰
重生定作名家子不待垂髫景運回

笠山禪師初度

霜晴徐步出城來為訪高僧琢鍊堆講罷雲封窗外竹

吟成香沁雪中梅廩山書問時相接公與無道人最善天界宗

風永不頽浪師久居天界公今繼之二十餘年了死生靈椿龜雀總

浮埃莊子真靈大椿是二物

除夕

光陰本似箭離弦此日光陰更可憐馬齒俄驚六九歲
龍髯已墜廿三年虛疑景運來天上獨有愁心到酒邊
看曆一回腸一斷山妻知不為無錢

丙午初度

以下丙午年作

平居初度感千端老大心情轉自寬滿地兵戈誰得免
苟全性命即為歡餘生但使貧而壽向學何論饑與寒
努力著書傳異代一年一部是奇觀頻年以來訂以歲成一書時六書貫

高脫

紛紛朋輩委塵埃我獨歸然亦壯哉身似忍冬藤不死
詩如曷旦鳥偏哀集成已得三千首興發猶能四十杯
但遇好花思痛飲茲辰况值早梅開

元宵雨集汪西京寓齋觀妓

燈時小雨亦愁人况復滂沱夜及晨好事如君難閉戶
衝泥為客盡閒身花邊更覺紅顏媚酒畔渾忘白髮新
二十年來相憶苦春遊排日莫辭頻

春雪飲鷺峰寺

三冬無雪長憂旱稍喜初春大雪飛密似楊花鋪野徑
閒將竹杖欵僧扉白鬚雅與吟肩稱采筆難教凍研揮
欲敵嚴寒多貰酒囊空不惜典緇衣

雪中柬彭寄菴

時寓隣菴賣卜

鷺峰西畔小樓孤晴雨皆宜雪更殊一派寒林真玉樹
半灣春水卽珠湖垂簾况有高人座躡屐何妨童子扶
聞說鄰家多美酒君平冑破百錢無

雨後訪吳平露汪西京不值

經旬風雨不停聲咫尺河橋似隔城今日杖藜纔一往
誰家開燕已先行私疑粉面聞香澤各擁紅兒喚小名
如此春光偷背我來朝須罰酒盈觥

上河訪王汾仲

同行者吳平露汪西京方望子吳不移黃俞邵程子介王安節

二月龍江春水生一塵漁屋曉窗明高人獨擁琴書坐
客至猶聞絃誦聲前約屢愆因久雨羣公咸集喜初晴
欲攄離抱憑尊酒又趁斜陽策蹇行

閱鄭所南詩

億翁頭白尚無家流落吳門老歲華心史雖然藏井穴
精誠終不隱泥沙生憎地走人形獸也覺春開鬼面花
斯語至今猶妙絕一回吟咏一長嗟

二月二日平露西京置酒舟中送余行

早春欲往京江去風雨日多晴日希新水暴生聲泔泔
故人送別情依依乘舟且泛此溪好把酒先問何時歸
歸期五月未爲遠相約重登燕子磯

京口訪談長益

君去燕齊八九年歸來鬚鬢已皤然階庭喜見嬰兒長
鄉里爭推大婦賢遊世豈應棲郭外買山自合遠江邊
詩文雖富未成集汲汲謀爲萬古傳

妙高臺看月

同陳翼仲省言上人

空江明月是奇觀况在金山絕頂看入夜魚龍潛水底
親人蟾兔落雲端煙波咫尺連滄海城郭微茫似彈丸
欲待鷄鳴猶不寐其如風露客衣單

贈李雲士

李生賣卜潤城中不與尋常日者同學本圖書兼象數
言依忠孝畧窮通百錢豈屑君平意二客長瞻季主風
好我論詩來夜夜短檠相對一燈紅

談長益移尊過予招同韓叔夜吳乾行何雍南程

千一小集各賦一詩

東風無賴走江沙吹落城南萬樹花我欲探梅空悵望
君雖載酒亦咨嗟飄零俱是四方客在冉能教兩鬢華
更有鄢陵韓叔子十年薄宦未歸家

同吳園次登多景樓兼送其之任吳興

春江二月柳條青画舸之官此暫經爲念南徐多古蹟
重登北固望滄溟舊交已是十年別高興何妨兩日停
遙指櫻桃花爛熳來朝連轡出郊坰

寒食日飲酒家

同集者關中孫豹人中州彭士報京口談長益陳延喜張季昭何雍南程千一潘雙南張子輓

江東又是禁煙節郭北無非上塚人久客未歸緣世難
舊交相見獨情親水邊亭榭多春酒花下衣冠剩逸民
不分青青垂柳色欺吾斑鬢漸如銀

清明日程崑崙司馬招同豹人其年小飲

客中正苦懽場少江上俄驚勝友來是日其年初至節序關心
吾老矣雲山滿眼興悠哉使君况有緇衣好公醺偏容

榜散才今夜燈前須痛飲不然懷抱向誰開

王詒白廣文招同董文友陳賡明游青山莊

蘭舟載酒出西門言訪名園近北村水樹重重藏島嶼
亭臺處處著琴尊經營空有萬金費題詠曾無一句存
五十年間三易主其他陵谷復何論

端午後一日得施尚白少叅書是日適聞周元亮

轉江寧糧憲

舊交風雅幾人存屈指愚山與櫟園稍喜官遷來建業
恰逢書寄自章門起廬欲待嘉賓至乞米先從仁祖言
秋月揚帆過蕭水賡酬知不厭頻繁

喜湯宮若見訪即送其歸江右

維舟江岸正黃昏先扣青谿竹下門脫粟那能克旅食

感懷無復報師恩時訪其尊公別來精進詩篇富歸去

倉皇暑氣煩知有白頭重慶在舞衣應不羨乘軒是年

之祖八十八
父母六十六

答曹州何惟重見寄

誰傳書札自南華中有新詩字字嘉尚憶壺觴吟雪際
獨憐漁釣老江涯春將壽母娛雙綵夜共賢兄讀五車
安得重來桃葉渡茅茨咫尺是君家維重兄弟幼時曾
居青溪共河房尚

露坐

日迫崦嵫尚未冥呼兒汲水洗堦庭艸根暑氣先秋失
樹杪風聲入夜聽病榻且宜三伏過書窗空負一燈青
閒中每憶平生友落落真同欲曙星

揚州晤顧云美感舊

論交三十六年前曾共秋林一醉眠此日才華方藉甚
如今容鬢各蒼狀新詩旣得江山助古篆還從金石傳
知爾心期似臯羽西臺拊節有誰憐

云美出徐勿齋羅稼軒兩公之門

荅支山上人見訪之作

支公冒雪上匡廬攬勝探奇日不虛六月揚帆向江左
三山枉駕正秋初滿囊詩有烟霞氣近市庵非水竹居
琢鍊堆邊好師友

謂笠山雪坡

亟移瓢笠勿躊躇

夜過七弟爾從寓中小飲

青谿稅宅近茅茨散屨相過不論時却恨新秋猶毒熱
直需淡夜有涼颺京江重到霍林寺石壁長吟馬素詩
卯角弟兄今白首濁醪頻勸復何辭

合肥贈唐祖命丈

六年不見唐耕塢老友常思聚會難何幸江城同旅舍
每千秋夜得盤桓銀鈎鐵畫燈前字金谷銅駝酒後歡
卻憶當時游泳處青谿明月幾人看

荅龔木公見貽之作

聞君卜築近方山水樹千重抱竹關圖史尚存先世業
亂離無改昔時顏貧交乍見情猶篤佳句雖投話未閒
我欲相尋棲隱地巖阿叢桂許誰攀

和州贈戴無忝兼懷令兄務旃

曾隱淳湖共若翁見君兄弟始成童旣經浩劫畱書種
卻訝辭家逐轉蓬往歲游仙奇太甚今春歸娶道方中
秋林把臂不勝喜矯首還憐白雁風

姚作哲招飲話舊

記爾維舟桃葉時，催妝曾和戴邢詩。敬夫孟貞故人宿艸那堪問，賤子漂萍亦可嗤。獨有林園娛老眼，常將杯斝召新知。况逢舊雨情偏洽，日日相過醉不辭。

孫曼倩齋頭看菊

孫翁書屋時黃花，花萼雖平意態嘉。囊本無錢偏好客，鄰皆有酒却難賒。壁間古篆匆能注，嶺外游蹤近可誇。山水故知閩越好，明年吾亦去天涯。孫是年從闕歸

孫敏克鑿池得泉屬題

君家小築傍城隅，密樹高岑景物殊。天遣山泉出階砌，客來茶飲當郵郵。醉楊雄從不憂生產，劉毅何妨溷博徒。如此聰明如此水，焉知人世有潢污。

嘉興重訪陳子木

三十年前禾水客，白頭重到自傷蒐。舊交艸木凋同盡，之子靈光歸獨存。城市無家空瓦礫，階庭有寶是瓊璠。杜門不與時賢接，爲我同心倒一尊。

飲朱子葆山樓

鴛鴦湖上雪霏霏，老我重游心事違。夾巷尚餘新戰壘，高人無改舊漁磯。山樓荒落多幽致，玉樹繽紛勝錦衣。况有芳樽能醉客，河橋昏黑竟忘歸。

贈大輿上人

客舍屢遷來古寺，居停何幸得高僧。殘冬閉戶寂無語，終日攤書知有憑。榻近茶烟融凍研，庭餘梅雪灑寒燈。此時畱我焚香坐，頓覺勞人百念澆。

早春游弁山法華寺

同游者寧都會止山孝感劉子常錢塘周勿菴宣城劉民

長 以下丁未年作

幾度尋山水漲谿輕舸直至寺門西
梅花時節灘猶淺桑樹人家徑不迷
老興渾忘筋力倦歸途又趁夕陽低
紅塵白髮空流浪安得長年此地棲

巖修人招同劉民長李望之葉伯如諸子夜集限

韻

二月陰寒不似春霏微雨雪更傷神
蝸廬兀坐無人問雞黍相期獨爾親
坐上羣賢皆博雅酒邊奇字鬪清新
道場浮玉東風暖尚欲撥梅醉幾巡

羅鏡菴招同曾止山諸子夜集有贈

作客攜家不當游居停况有看山樓
窗間獨樹梅花發郭外千峯雨氣浮
榻擁奇書多按索酒逢窮士倍綢繆
牆東咫尺為吾寓春夜頻過一散愁

送曾止山之吳門

歲晏來游碧浪湖主人尊曠不堪呼
獨攜破笠尋山寺且喜貧交得酒徒
快意那能如百粵止山去年
粵遊甚壯早春端
合去三吳停舟先問靈巖路鄧尉梅花天下無

三月三日飲程弘執寓兼贈令兄在茲去疑

無端作客向茗谿花下愁聞春鳥嘯
賴有良朋相慰語每逢佳節自含悽
賢兄好事情偏篤禊日臨流手重攜
對酒不辭今夜醉來朝風雨各東西

清明日丹徒道中

日歸端在杏花時又見桃花紅滿枝
尚想家園過寒食

却嫌風雨故羈遲丹陽路北江關近白髮人慳與馬資
借問同舟爲客者茲辰誰不動鄉思

喜晤宋荔裳觀察四首

孤竹城南送客歸蒙將山繭製春衣方期列宿三台近
豈料嚴霜六月飛猿雀勢難通遠問鳳慶天遣脫危機
滄江白髮重相見痛飲狂歌定不違子與荔裳別自承平戊戌迄丙午十

年矣

頻年憂患兩寅同庚寅壬寅荔裳凡兩下獄却訝詩文轉更工名世

那能兼厚祿著書元不諱奇窮况逢温玉來吳下遂有

明珠入掌中宋五十未有子至此事崢嶸良足慰從前

縲紲總成空荔裳疊遭患難皆同室操戈事既昭雪詩文益工頃以所著安雅堂前後諸集屬子

評

握手相看涕淚滋故交應不比新知惟君多難髯猶黑

愧我長貧鬢已絲對酒飛揚如昨日登山矍鑠異當時

棲霞天闕南中勝努力追攀未許遲往與荔裳于蕪湖權關每同登眺步

履甚健也

濱海山林豺虎多惡哉同姓又操戈丈夫豈必懷鄉土

仕宦尤宜慎網羅鶴市南頭好花月燕磯東畔少風波

此方卜築堪娛老買宅無錢奈若何

午日石埭姚六康明府招同諸子燕集各賦一詩

同集者粵東盧升卿王仁植黎次仲龔含五漢陽李雲田會稽姜鐵夫慈谿周九逸烏程陳宗

彝上海陳鱣江青陽孫儼若吾里姚彥昭

谿雨絲絲不住聲恰逢嘉節四山晴荒樓正擬羣公聚

綺席俄傳茂宰迎觴有蒲榴隨俗泛盤惟筍蕨見君清

平生故舊多仙侶誰似陵陽賈子明

題高樓壁

將衰筋力厭樓居却喜茲樓曠有餘檻外雲峯宛圖書
門前歌唱總樵漁青谿雨過空看水白日窗明好著書
只是山廚愁旅食主人貧儉客何如

青陽訪甯山同不值

小別俄驚十二年相思惟有尺書傳特來九子求良晤
豈料孤雲又各天我到江城尚畱滯君歸山館勿遷延
此番若不舒離抱向後佳期更杳然

秋浦立秋喜吳山賓見過

酷暑經旬戶未窺兼之跣足病瘡痍從僧看曆知秋近
厭客敲門獨爾交衷出高文箋石鼓瓢傾濁酒潤詩脾
來朝相約青谿去勝事先尋白笥陂

送孫臥公歸里

秋浦逢秋返舊谿琴書以外不多攜為憐巧語謀鸚鵡
更愛長年養鹿麋才似瀾衡休浪擲山如李渤合幽棲
祇愁林壑難容汝仍想天街逐馬蹏

六月廿六日為內人四十初度寄之

白爾歸予便食貧不辭麻桌佐松筠年年作客輕離別
事事持家多苦辛二女雖然娛老眼一兒還想繼吟身
莫言小姓求人種畢竟藍田玉足珍

七夕喜甯山同至

九華山下訪君廬君去蕪陰兩月餘寄語還家到池口
果然命駕及秋初蕭騷容鬢都非昔激楚詩歌迥自如

欲話離情惟有酒豈應空曬郝隆書

贈石開上人

善慶庵故劉徵君讀書處梅花甚多爲兵所伐今施作庵

梅花書屋想徵君梧竹交柯似碧雲悍卒摧殘何太虐
老僧培植不辭勤炎歊謝客偏留我緇素能詩更出羣
淪茗焚香常夜坐緇衣蘿月白紛紛

王郇雨少府見過謝之

百牙山後小庵孤竹樹陰濃暑氣無客借僧房同結夏
陰分邦伯宛棲梧忽聞車蓋來荒徑乍觀風儀識壯圖
四海蒼生望霖雨豈應佐郡獨沾濡

陳碧涵學博招飲有贈

鱗口停舟暑未殘城中何處得林巒荒園稍喜鄰文廟
芳徑時來問講壇好客故爲河朔飲張筵不似腐儒餐

北窗古樹高千尺坐久能令六月寒

送從子處厚返瀾山兼寄令岳陳襄雲

天柱高人汝婦翁幽棲真有上皇風得爲佳婿身何幸
況是孤兒命正窮祗合相依如父子無緣長任各西東
殷勤寄語龍河壩明歲重來訪桂叢

魯江訪胡逸菴不遇因補悼亡之作

不到于湖十六年今秋重泊過江船故人遠出柴門閉
健婦新亡總帳懸治具倉皇煩令子遺懷曠達讓前賢
君雖半百猶青鬢可許花枝笑獨眠

吳素夫六十初度

君際滄桑未四旬甘辭榮祿慕遺民逐禽那及棋枰樂
桐馬何如茗盃新粟里有詩惟紀晉桃源無路可通秦

翁年耄耄兒才智豈獨高人又福人

卜仲璿移居

舊居桃葉渡西偏爾我為鄰五六年別去城南非遠甚
重來巷北更懽然琴書有暇頻相訪酒脯能賒不計錢
況是兩家綦縞熟花時閒步短籬邊

歷陽留別龍天士

江縣重過不似初得逢之子興蕭疎西窗月冷爭浮蟻
南國霜晴看打魚歲暮獨憐吾欲別官遷亦恐客難居
相期春暖來姑訊白紵青山信所如

同轡中峽飲王左車宅

隔江風雪去還來甥舅同舟笑口開左車之子中峽之甥也時同往江浦
況有香醪足斟酌兼之良友得追陪西窗剪燭聊談

坐南浦歸帆且漫催不記去冬長水客楞嚴寺裏撥寒
灰

臘雪吟

江東今歲苦蝗蝻蘆葉禾苗總不堪正畏催租如猛虎
更愁遺種似春蠶連朝大雪驅除盡四野嚴寒凍餓甘
我有高樓供遠眺典衣聊復取微酣

丁未除夕喜顧云美曾止山見過守歲

青谿淡處艸堂開榆柳逢春淑氣回遂有故人千里至
不辭除夜一燈來閒身且寄隣僧榻快意唯憑濁酒杯
却望蔣山雲物變野夫白首重興哀

戊申元旦蘇州顧云美嘉興朱子孫贛州曾止山

紹興吳平露同集哺雛軒分賦以下戊申年作

我所懷人各一方今春何幸得同堂虎丘公讌年猶少

崇禎辛未與云美社集 鴛水重遊鬢已蒼子孫亦三十

虎丘今三十七年矣 塞出盧龍成舊雨戊戌與平露相遇永平 路

至嘉興與盤桓兩月 分茗雪感新霜止山亦二十年之交去 萍踪會合非容

易日日相過醉不妨

虎踞關訪半千新居有贈

移居不喜近長干俗客來多應接難路出清涼臺更遠

宅如書畫舫猶寬梅花竹葉充庭際萬壑千峯繞筆端

只是吾徒太寥廓新詩吟罷與誰看

為顧云美六十壽

年少相逢古劍池亭亭玉樹吐華滋那堪甲子須臾過

偏在乾坤板蕩時老人舊京歌黍稷冷棲荒刹近茅茨

莫言後輩無知己爭誦先生六十詩

旅食僧廚不自供蕭然瓢笠與孤筇周秦繆篆人爭乞

韓蔡分書眾所宗靈谷撥梅尋斷碣生綃畫鶴上高松

雖云戶小難勝酒初度無能買一甕平

得錢湘靈書却寄

聞君長夏病侵陵幾欲過從恨未能久雨泥途難著屐

炎天火日畏擔簦相思空有三秋詠同老何堪百慮增

忽捧來書身已健懽如赤脚踏層冰

鄧元昭太史招飲中林堂因訪前輩市隱園詩予

有六卷遂舉以贈并係長句

秋澗為園淮水東三吳名士聚其中顧華玉文徵仲王

皆詩有年來易主真成俗此日開顏合在公芳樹淥波生元美王雅宜諸公

氣色青尊白髮想流風吾家舊有羣賢什相贈還期好事同

三藏殿避暑題七淨師壁

長夏城居熱不堪更愁俗客每停驂山僧舊識房容借竹院新涼睡易酣肺病食蔬元有益心清下筆頗無慚詩逋文債俱完却持與鄰翁共笑譚

時唐祖命徐子能張葛民皆在寺寓

紀災

戊申六月多災異太白光芒與日爭

是年夏太白晝見者四十日

地

動似舟行巨浪

六月十七夜地大震民舍多傾

雨翻如瀑下層城

二十六夜

地又動大風雨平地水深三尺水波乍湧蛟龍怒墻屋皆頽鷄犬驚憂

亂惟思入林壑山中何處有柴荆

立秋後二日王望如明府招飲卽事

傲吏將之嶺海官頽愁炎暑歷嶮旣新秋漸爽車當發老友頻過興未闌但對酒杯安笑樂漫言時事總艱難如君十七年科自尚屈絃歌亦可歎

月夜過吳平露寓樓小飲限韻

莫春歸渡浙江潮徂暑重來白下橋自有閒心似冰雪何妨假館近塵囂樓頭好景書千卷雨後新涼酒一瓢恰喜老夫乘月至狂吟差不負今宵

重晤黃仙裳因造酒家小飲懷舊有作

江關為別正黃昏堅約明年過白門及至草堂余又出見懷詩句爾猶存秋溪何幸來雙槳野店相期倒一尊聞說曾澆亡友墓萬松溪處獨傷寬

顧與治葬後惟仙裳至墓所故云

題徐仲光荷山艸堂卷

嶺海歸來重歎嗟荷山淡處老煙霞漫言此地堪終隱
底事頻年不在家玩世且同華表鶴維舟先聽白門鷄
問君可是徐鴻客行見楊花變李花

荅林二史見訪之作

聞君秋到冶城山幾欲相過步履艱却枉高軒來委巷
更投佳句慰離顏江村飢餓髭全白邊塞馳驅鬢亦斑
獨惜連枝易顛顛下浮橋畔水潺潺林從兄青仲居下浮橋今亡矣

鷲峯寺前閒步

此地舊爲江令宅如今俱是種園人水邊籬落數間屋
野外花枝八月春羊豆馬芹何歷亂雁紅雞絳亦鮮新
其中更覺秋葵好朶朶微黃似麴塵編豆一名羊眼豆
旱芹一名馬蹄具

載本草
綱目

送孔吉人遊宣城

孟夏馳驅來舊京新秋又作宛谿行敬亭山好孤雲在
愛嶂樓空片月明未向河橋折楊柳先攜酒脯過柴荆
歸時只恐余它往送別江頭無限情

柬魏惟度

清涼臺畔鄭公祠千古高風永在茲密樹能留長夏客
開窗重訂列朝詩殷璠元結人爭慕陸放倪迂我自嗤
詩非何堪供採掇愧無瓊玖報相知

爲鈕翁六十壽

家近江東春水邊奈淮夏屋又新遷一生不涉波濤險
萬里爭輸食貨錢蘭秀菊芳多樂事童顏鶴髮宛神仙
逍遙游復能齊物身在南華第幾篇

中秋日支山上人林二史黃僊裳曹无咎沈方鄴
同集艸堂限懷字

客中見月應多感况是秋風更愴懷載酒何勞出山郭
仙裳欲攜酒上譚詩聊以就茅齋風塵奔走年俱老瓢酌
飲莫愁湖上歸休願未諧且與良朋醉今夕江颿明發各天涯時二
歸聞仙裳將歸邗方鄴將
游粵余亦有石塘之行

九日飲邢命石水閣有感

野塘秋水漫籬根欺我黃花無一存猶有寒蔬生廢圃
不堪衰柳映衡門洽谿偶過良朋寓把酒閒將舊事論
昨日紅顏今白首每逢嘉節暗聲吞

贈趙伯良孝廉

伯良別號頑蘇廣東新會縣人

頑蘇本是宋王孫千古崖山一綫存每到臨安先隕涕

重來建業亦傷魂囊詩但就遺民語看劍難忘國士恩
更有同心俞籥石幾時朋酒醉荒邨篇石為伯良好友
是時亦在江寧

送西圃雪坡二衲游天目

是夜同宿

莫愁湖上霜寒夜係楚樓邊葉落時二子言尋天目路
千峰獨禮玉林師時玉林師
隱居天目殷勤參學惟聞道閒暇看
山不廢詩雲雀雙飛隨所適定于何處覓禪枝

寄叩門何令

晴冬客過石門山南望琴堂咫尺間幾欲看花來作賦
却憐飛鳥倦思還尊鼎曾泛河亭月冰雪如親仙令顏
暫借雙鳧傳錦字可無芳訊及江關

贈趙子正

子正工八分書乃為
營將防駭故惜之

歲暮來游石墨山聞君風雅意相關祇緣入郡交何晚

纔得持杯我又還書擅八分能瘦硬學從二篆亦溪嫻
斯人位置宜天祿豈合理名絳灌間

初春送屈翁山返番禺

以下已酉年作

歲晏君從絕塞歸遠攜新婦覲庭闈梅花開日催征櫂
荔子香時著舞衣私念炎方多戰壘每懷白下隱漁磯
明春倘奉高堂至卜宅牆東願不違

再送翁山

詩名輪爾擅東南爾却推予予自慙千里外猶勞遠信
一燈前始盡淡譚心縣寸艸歸難緩雪凍柔條折不堪
知有故人爲傲吏陵陽丹溜必須挾

同屈翁山飲周雨邨齋留宿

周生買宅傍城隅中有方塘似鑑湖新築長隄種楊柳
重開精舍面菰蒲稱詩雅與騷人合索酒因借野老俱
春雨淒寒歸不得紙窗吟榻共氍毹

兄子邵邨五十

十年多難走風塵此日還家樂事真亭沼重開將壽母
填篋合奏燕嘉賓夢回紫塞山川險興發青谿艸樹新
併入王維詩畫裏流傳人代亦千春

送林二史歸莆田

薄宦迢迢出雁門所期祿養逮親存那知風木翻多恨
欲返鄉關豈易言身繫十年容鬢改手扶三櫪淚聲吞
貧交無物堪持贈送別江頭亦斷魂

送葉亨立歸漳州兼懷令叔伯俞先生

三月桃花雪正寒江亭送客意辛酸情知湖上游當壯

想到閩中春已殘家有高人眠土室吾將尺素寄漁竿
明年初夏同來此把酒論詩覺更懽

三月十九日作

野老難忘故國恩年年慟哭向江門南徐郭外三停櫂
北固山頭獨愴冤乙酉丙午已酉三流水滔滔何日返
遣民落落幾人存錢生未死重相見雙袖龍鍾盡血痕

是日遇錢
馭少故云

吳伯成明府招同秦雷仙太史周子俶顧脩遠徐

原一龔介眉孝廉黃漢臣高士嚴蓀友徐安士

顧天石馬雲翎茂才社集限韻次日伯成去吳

門子亦歸矣

相逢恨不數年前每過梁谿輿勃然今夜始霑仙令酒

來朝又泛洞庭船羣公咸集成高會孤櫂難停是別筵

碧澗青峯芳艸合榜人回省重流連

三月晦日秦雷仙太史招同諸子燕集有贈

欲揆名園入惠山連朝風雨阻躋攀天香閣上書千卷

金匱墩前水一灣大香閣金匱墩
昔雷儒所居行酒賦詩羣彥集落

花飛絮寸心閒獨憐白髮逢春暮坐到鷄鳴且未還

贈別崑山徐原一

九龍山下柳如絲正是河橋送別時老我風塵無所遇

感君意氣獨相知連宵拚醉賢人酒他日還吟國雅詩

原詩刻
國雅集中江上煙波殊未遠常將著作寄茅茨

為鄭母七十壽其子允吉棣能兄弟皆與子善

東園小築結比鄰歲久方知孝友真且必舞衣娛壽母

老猶劉薦待聞人生資萬卷術何慎酒泛千鍾家不貧
色養漫勞誇五鼎輸君魚笋及時新

送錢湘靈北游時予亦將之楚

蚤春卽擬去燕山仲夏猶然臥竹關
薊北風塵難作客江南花鳥且怡顏
稍能薄粥供朝夕何苦長途數往還
勸爾勿遊吾轉出蒼茫煙艇適荆蠻

將之皖口畱別吳畊方著作

長夏園居臥北窗那堪觸熱去風江
寒裳擬作沅湘客停權先經父母邦
老我征衫塵僕僕懷君寓閣水淙淙
司空山下逢仙令珍重爲傳鯉一雙

喜趙國子見訪卽別

鬱孤臺下歲將殘與爾言詩意甚懽
一公嶺南音寂寂重遊薊北路漫漫
停舟爲訪幽人宅開卷如翻大海瀾
正好追陪向林壑却愁予又別江干

古上菴喜七弟爾從至

同氣離居二十年何曾一夕對牀眠
不圖江岸炎蒸日却有山窗信宿緣
露坐且酤樅市酒曉風又逐漢陽船
來朝把袂應難別重泛龍湖醉鹿田

白鹿山莊書懷兼示從孫有懷

山房曾共阿咸居一歲中完兩漢書
本擬名成光史冊那知世變老樵漁
故鄉久別歸來晚芳徑重過感慨初
愛爾能承王父業荷衣應不羨簪裾

皖上訪程崑崙試守

鐵甕城邊春水波使君高義獨峩峩
三年客過三停擢

一度花開一放歌復有棠陰移皖口時傳芳訊及巖阿
相思今始舒懷抱正好追隨奈別何

東陳襄雲兼寄豫字爾靖元的

年年相約會江樓底事蹉跎春復秋逐滄正當三伏日
飢驅未及萬山游石湖新月期君至塔寺涼颼散客愁
借問巖栖諸老友誰能高興亦同舟

贈蔣素書兼送其應舉白下

老我新從建業還聞君詞賦動江關停舟先訪城南路
開卷如登雨後山橘酒蘭香頗有贈琪花瓊樹定須攀
他年吾郡推風雅名在任張伯仲間

任克家
張子下

七夕飲成二鴻先生三劍閣

九龍山下大寒樓著舊端居百不憂底事江城猶買宅
淡知天地亦虛舟室中雲嶺千重出枕畔香醪盡日浮
梧井陰濃容避暑况逢佳節又新秋

金山續集

皖桐方文爾止著

壻繡水王槩安節訂

五言排律

問旭上人三十初度

以下癸卯年作

南國多才士名家得幾人
 顧翁書入聖朱老畫通神
 二妙專前美惟公繼後塵
上人字學顧與治聰明應獨絕
 畫學朱漢之故云
 筆墨遂兼臻雖在喧囂寺
 偏于冷淡親垢氛
 渾不染修潔果無倫
 頃者年方壯居然學已醇
 虛懷加毘勉老氣更嶙峋
 况復攻詩律從茲悟佛因
 若全如滿壽必與巨然鄰
 玉塵王夷甫金龜賀季真
 宰官非不善終愧比丘身

七夕書懷

長夏熱無比交秋氣稍平涼風吹戶牖細雨溼柴荆况
是雙星節能令四體輕中庭容偃仰北斗正崢嶸河漢
水方淺關山月未盈杯盤風俗舊兒女笑言清乞巧心
何切穿針眼倍明爾曹焉用此吾拙自天生抱甕安窮
老乘槎憶遠征去年今夜酒薄醉廣陵城

次韻題吳不官詩卷

昔有論詩者如叅大小禪圓通由妙悟積象在多年豈
許空踈輩能耕鹵莽田吳生家震澤逸興寓林泉恥作
鍾譚語全師葛顧篇不官洞庭東山人葛震甫往以詩
鳴其間不官猶及事之并師事顧
與視身同老衲於世總浮煙湖海憑孤往胸懷自廓然
白頭歸故里丹竈慕前賢茅宇堪休息藤牀合醉眠奈
何霜雪裏又上過江船

飲朱四均園中漫成二十韻

何處堪休夏城南半水園當年名市隱嘉客若雲屯秋
澗開東閣姚秋澗初開弁州稅北轅王弁州曾此有記其餘焦
顧董焦初詩亦多顧董不憚往來煩易世主人換空庭喬木

存春秋希燕賞冷落類江村幸有朱公子來遊白下門
阿翁官憲臬買宅得丘樊文筆本森秀虛衷更討論性
情詩最捷師友義尤敦此日除芳徑相招坐竹軒芰荷
香氣遠槐柳綠陰繁高棟全無暑崇朝直至昏野航浮
沼面涼几列雲根茗果隨時供壺觴弗強吞問途親老
馬舒采奮雛鷄加以沈酣力當為墀玷尊佇看園復盛
莫訝客長喧予昔曾題句君今尚詠言可知懷抱合風
雅許重騫

魚龍洞紀遊二十六韻石堞沈師鴻沈十州邀同姚彥昭共游各有作書之

石壁

正想魚龍勝無從得主人逢君兄弟好贈我詠言新偶
 爾商遊事欣然往問津涼風初過雨沙路不生塵未覺
 豁行遠來尋洞口春小舸穿竇穴列炬照嶙峋海島層
 層似鮫宮面面真奇花多菡萏古木盡松筠鐘鼓皆成
 響鯨鯢亦聳鱗仙翁睂目具老鶴羽毛馴最妙娑羅樹
 全遮金粟身水簾飛蝙蝠石澗立麒麟平坦高坡上依
 稀淺渚濱方臺容客坐冷飲不妨醇野興重更燭清謳
 一啟脣祇疑聽仙樂奚止避狂秦往路仍淡遠舟師怯
 鬼神石門誰敢入險地不須臻解艦催迴去蛟螭恐怒
 噴順流休蕩槳急瀨可垂緝冥黑如過夜熒微漸及晨
 茲遊嘆奇絕前此更無倫理策歸村店禡衣臥草茵山
 家還送酒爛醉莫辭頻四美元難遊孤懷豈易陳惟應
 卜居此長與爾為鄰

胡君渥先生七十壽以下戊申年作

國初勛與戚富貴亦多人及至滄桑後何無社稷臣開
 平猶有裔蒼谷獨潛身餘子皆庸錄孤高誰比倫多君
 兄弟好奕世王家親不忍趙王服寧甘版子緡葺茅先
 隴側種菜大河濱破帽隨禪侶方袍遠俗塵言詞常激
 烈膽氣特輪囷自命誠千古安驅至七旬前年兄介壽
 今歲弟同春鄉里稱人瑞吾徒重逸民畫松雙幹老釀
 黍一栢新勿問今何代惟知醉此辰尋常福祿語對爾
 不堪陳

金山續集

皖桐方文瀾止著

塔繡水王槩安節訂

五言絕句

青溪歎

白下青溪路倡樓楊柳枝可憐生此日不見盛明時

白髮歎

老夫年五十白髮猶未生何事三年內千莖復萬莖

春日漫興

莫種章臺柳長條空復情何曾繫郎馬只是送人行

暑夜聞歌

涼風吹夕渚明月漾秋波不見采蓮女但聞采蓮歌

秋花雜詠

以下戊申年作

秋夜風雨環堵皆傾而秋花無恙予顧而樂之
忘其貧窶也各賦一詩

秋蘭

寧作幽人佩羞稱王者香眼中看不厭吾鼻轉相忘

秋葵

紅紫皆俗花鵝黃獨風韻亦有向陽心今人復誰問

秋海棠

春華吾不喜冷豔獨推君秀色嬌娥似微香靜者聞

茉莉

花向夜分開蕊白初昏摘山妻插滿頭香亦被牀簀

玉簪

玉簪時不尚何況玉簪花白向墻陰老休教樹葉遮

鷄冠

絳幘人已非翰音猶未改花雖無鳥聲其意亦有待

雁來紅

莫漫誇霜葉先霜葉已紅天邊聞塞雁根下響秋蟲

金山續集

皖桐方文爾止著

塔繡水王槩安節訂

七言絕句

和丘季貞燈夕詩

以下正寅年作

月明曾聽廣陵簫別後相思淮水遙
七字吟成腸欲斷人間從此廢元宵

落馬湖

落馬湖邊蘆荻秋白波無岸榜人愁
何期天與東風便三日揚帆到濟州

中秋泊夏鎮

乍寒無客不思家况是中秋見月華
且買村醪自斟酌莫因羈旅重咨嗟

念山集
明月青溪一草堂幽蘭叢桂藥爭香主人何事貪爲客
昨歲潯陽今汶陽

題樊會公小像

以下癸卯年作

此是樊生廿載前風標巾舄似神仙如今漸老容非昔
破屋埋頭野寺邊

繪事江東有八家君工人物更修姱奈何不把青銅鏡
白寫真形對雨花

買花

三日春陰一日晴街頭忽聽賣花聲紛紛桃李渾閒事
楊柳梧桐最有情

與天寄上人感舊

三十年前此讀書見公總角出家初如今重到回光寺

公已二毛何況予

狹斜門巷舊逶迤化作荒園長兔葵惟有禪林終不改

佛前仍點舊琉璃

回光寺在舊院後故云

贈歌者韻郎

二月江南草樹芳鶯歌一曲斷人腸牡丹亭畔梅花下
何處重尋杜麗娘

西秦才子客東吳蕭寺過從興不孤豫恐春殘欲分手

倩人先作掃花圖

謝仲美爲王無異作掃花圖貌韻郎于其側

竹林寺

竹裏高樓遠見江山僧白日臥西窓惟愁松鼠偷新笋
時向東籬白擊柝

午日楊靜山太史招看龍舟因出北門看竹

片片龍舟下急湍水邊觀者萬人歡老夫別有怡情處
嘉樹園中竹萬竿

贈錢二郎

牧齋先生之孫也先生
屬于字之字曰霸先

錢郎十歲五經通鄉里皆知是聖童自合玉堂繩祖武
不應金鏡被塵蒙

松圓詩老擅風騷乃祖推尊義更高我有遺烟剛四笏

殷勤贈爾助揮毫

松圓詩老程孟陽也手製
墨極佳予以四笏贈二郎

吳越稱王志未申耳孫英絕悟前因霸先字汝非無意

莫忘髫年取字人

錢乃吳越王
鏐之後故云

贈滕鍊師

仙觀仍從大宋開道衣不學至元裁問君可是林靈素
曾見奎星奏事來

紅豆詩

虞山之東三十里有芙蓉莊乃牧齋先生讀書

處也莊前紅豆樹一株高數丈圍數尺枝葉蒼

翠不花者二十年矣辛丑三月忽開花是年九

月為先生八十初度枝頭又結一子似特為先

生壽者先生暨諸同志各為詩以張之踰年癸

卯予至虞山聞其事亦補八首

秋來紅豆生南國恰遇仙翁大耋時樂府重翻新製曲

莫教仍唱右丞詩

花似揚州玉藥開實如南海紺珠來祇因五百年前樹

曾作君家錦綉堆

猶記朱櫻出上關寢園薦罷賜千官誰將一粒相思子

依舊雙擎赤玉盤
狂風吹屋捲衡茅
一點腥紅綴樹梢
莫是天公有淡意
萬年枝上藥重苞

天寶開元迹已陳
閒思往事淚沾巾
秋風南國吹禾黍
愁殺當筵唱曲人

荆棘銅駝絕可憐
江村瑠樹尚依然
從今逆數花開日
正是崇禎十七年

二十年來始一花
花開結子類丹砂
憑誰記曲屏風後
自有仙人萼綠華

君家遠祖年八百
應見枝頭四十紅
八十老人凡四見
再回便是百齡翁

夜泊

風吹湖面菱荷香
夜泊橋頭枕簟涼
天與詩人送詩料
一鈞殘月挂垂楊

丹陽

江行無奈逆風何
上岸驢羣不受馱
欲覓肩輿資斧少
丹陽郭外跨青騾

晝寢

休夏無如睡味長
却嫌人事苦相妨
今朝雨氣能迴客
竟日齁聲欲撼牀

夜坐

晝長夜短惜勞生
早晚貪眠差可平
江雨過門山月出
池邊露坐又三更

煮瓠

曉出柴扉雨氣新
家園瓜瓠驟輪囷
摘來爛煮如蒸鴨
熊掌駝峰未足珍

贈老僧

山陰人自言少時為毛帥健兒

韎韐曾從遼海軍
袈裟歸臥剡溪雲
可憐射虎屠蛟手
今日揮蠅與拍蚊

題倪閣公近稿

詩篇直出元和上
書法全從淳化來
與治不生于死
眼前誰似爾通才

題葉九來小像

石上松濤雜礫聲
睂間喜動是詩成
世人但道金門好
驃騎何如第五名

九來之兄詒庵方在館閣

龍江關雨泊

平生睡美向舟中
况是秋江雨滴逢
久客自諳行路法
閒身不恨石尤風

廣陵一貴家

燕客伶人呈劇目
首坐者點萬年歡
予大呼曰不可
豈有使祖宗立於堂下而我輩

坐觀者乎
主人重違客意
予即奮袖而起曰
吾寧先去留此一綫於天地間
王貽上拊几曰壯哉遺民也
遂改他劇

黍離麥秀尚消魂
何況威儀儼至尊
莫道人心盡漸滅
也留一綫在乾坤

雖然遊戲事非真
優孟衣冠亦感人
却訝先朝曾扮此
當筵未見有人嗔

客至

山家酒熟不須酤况有瓜疇與芋區爭道主人貧好客
誰知囊底一錢無

上元月蝕爲雲所隱

以下甲辰年作

他鄉又見歲華新元夕偏傷客子神若對月明愁轉劇
不如無月免愁人

頻年日食不爲災月食何妨閨又來獨憐今夜雲遮却
依舊團圓十二回

牛首山密公房

兜率崖前萬樹松文殊洞口一聲鐘雨窓睡起憑欄立
疑是匡廬五老峰

題王元仲先生小像

神廟遺民世所稀斯人髣髴漢官威可憐諸葛真名士
竟作南陽老布衣

題張則之小像

二十年前曾識君風流文采冠人羣如今勲業窺明鏡
獨坐蒲團禮白雲

茗溪作客夏偏長每食無餘亦可傷幸有故人來慰藉
佛前私語詎能忘

秋艇將遊明聖湖自慚囊底一錢無窮魚敢望西江水
百斛能令渴者蘇

二十年前患難交知君雅意未全拋獨憐咫尺同千里
筆得雲雷第五爻

莫言托鉢是閒身到此棲遲已六旬明日我當歸故國
昔年君亦作遊人

東王汾仲

草閣藤牀竹火爐三冬月俸仰生徒故人有疾憑君養
古道如今久已無

雪後懷林茂之先生

凍雪初晴鳥曬毛閒攜幼女出林臯家人莫道兒衣薄
八十五翁猶緼袍

溪行遇牛首僧

雪後柴門暴背時起行溪畔看流澌山僧相見私相語
此老胸中無數詩

杜湘草有蘆笛製甚工其聲亦異爲贈此詩

截蘆爲笛世應無吹氣如蘭爾獨殊但遇知音桓子野
不愁入破李君墓

題友人蛺蝶圖

學畫無如畫蝶難蝶身文采百千般花間撲取生蝴蝶
夾在書中仔細看

題張大風畫四首

梅花開後杏花開酒伴騎驢邨店來不惜千錢沽一斗
當壚笑指玉山頰

漁翁小艇繫槎枒楊柳陰中賣酒家取醉北窗消永日
階庭況有石榴花

亂山淡處白雲屯幾箇人家晝掩門野老杖藜時一出
蕭蕭黃葉滿前邨

萬壑千峰一雪埋山家羣樹總枯柴早梅獨綻寒崖下
踏破閒僧舊草鞋

霜月

曉啟柴扉霜似雪，夜歸蓬徑月如霜。老夫不畏寒侵骨，貪看霜天明月光。

荅王左車父子以詩見寄

羣公騎馬朝回日，大賈停船貨殖時。上聲似王家三父子，雪窗燈火共吟詩。

半嶺庵看花戲題其壁

以下乙巳年作

石頭城裏花無數，絕艷誰如半嶺菴。一座錦山堆院落，三春麗日占江南。

梅蕊蘭英雖可愛，嬌紅終遜海棠花。白公有句非輕薄，惱得山僧悔出家。

同龔半干訪掃葉上人

乍觀丰姿山澤臞，徐看題詠雪霜鋪。不知付拂開堂者，曾道斯人半句無。

二月十二日作

老至貪杯不厭頻，况逢桃李鬪芳春。今朝病酒難重醉，孤負百花初度辰。

又題王貽上看花園

水部梅花事已非，法曹吟閣尚依稀。新年聞說蕃釐觀，芍藥重開金帶圍。

祖堂訪石谿師不遇

冬春相約訪山屏，風雨蹉跎心事違。今日我來公又出，短垣修竹映斜暉。

題吳子班一草亭冊

燕雀湖邊風雨冥黃屏碧瓦總飄零如何秋浦淡山裏
尚剩乾坤一草亭

浩氣爲雲入太虛傳家祇有數行書竹籬茅舍堪棲隱
絕勝蘭臺芸閣居

題姚伯輔小像

仙居山下呂徽之米桶盛妻凍不辭今日姚生重隱處
高風寧復異當時

題江天際畫

平山堂下遇江生曾寫雲峰送我行今日重來已陳迹
紅橋秋柳不勝情

憶予十歲時初學爲詩清明日隨塾師出郭至丁

翁家有絳桃綠梅二本翁言手自種果三四年

便開花師因命予作絕句予應聲云云翁大喜
爲書屏間今四十餘載翁之子某過予話舊因

誦前詩附錄

龍眠山下野人家一片寒香覆白沙聞說當年種梅子
如今梅子復梅花

龍眠山下野人家一簇繁英似赤霞聞說當年種桃子
如今桃子復桃花

題汪西京像卷 以下丙午年作

若翁殉難廣陵城義烈能齊史相名賢子豈容通仕籍
風篁雪澗了餘生

邗上遇沈方鄴卽送其歸宛

蕪城相遇太忽忽却喜歌筵此暫同歌罷出門天色曙

渡頭雙艇各西東
垂垂新柳裊江關
愁殺行人不共攀
最是難忘舊游處
孤雲眾鳥敬亭山

潤州卽事

高閣平臨鐵甕城
城頭朝夕海螺鳴
聲聲凄切已如此
况復笳聲與角聲

與諸公遊鶴林寺飲米元章墓柏下

載酒尋芳去復來
南宮祠墓獨徘徊
無花亦合醉於此
况有櫻桃千樹開

鶴林寺懷古

青春重到鶴林寺
白首長吟李涉詩
竹院閒猶似當日
逢僧話亦不多時

黃鶴山頭黃鶴樓
杜鵑花下杜鵑啼
仙蹤一去無消息
只有僧樓面舊谿

唐殷七七令杜鵑九日開花今有杜鵑樓

元章死葬此山根
誓作伽藍護法門
游客到來皆酹酒
何須上塚定兒孫

宋米芾有墓在寺前芾嘗發願為鶴林寺伽藍後果然

馬素埵前多古松
相傳此老是禪宗
卽如同氣連枝句
已作人間夜半鐘

宋禪師馬素葬此其詩云一回相見一回老能得幾時為弟兄

八公巖題一微上人壁

石澗涓涓聽不窮
况多竹韻與松風
山頭亦有淮南桂
無復仙人似八公

焦山絕頂

百尺高樓四面江山
僧終日坐晴窗客來何物供茶具
指點園丁摘蜂蠶

本草虹豆名蜂蠶

中冷泉

百排山下有三澗惟有中澗著水經可惜江波沒泉眼
非時那得注銅餅

卽事贈周建西子常

月華山畔雨蕭蕭賴爾勤過破寂寥貧士那能長得酒
花村茶舍日相邀

牙落

鏡裏容衰甚不平酒邊牙落更堪驚也知髮白難重黑
敢望他年兒齒生
山木逢秋葉自辭篋中何用強收之封題尚記今年月
丙午常州立夏時

旅食歎

初夏將爲閩粵遊南薰恐不利行舟早知五月多陰雨
汲汲揚帆豈待秋
自愧饑驅來往頻祇因升斗困風塵女兒年少不知事
只道天無餓死人

門戶全憑健婦持朝朝簾下劈青絲織成衣帶輕如許
不斷炊煙幸在茲

本草相傳辟穀方麻仁黑豆最爲良良方豈必凶年試
大藥應從此日嘗

人世皆爲口腹營濁醪麤飯了吾生來朝米盡將何食
且把園蔬煮作羹

謾說青門五色瓜庾郎三韭亦豪華爛蒸去毛勿拗頸
充盤瓠子更堪誇

六月

六月重衾更著綿陰寒渾似莫秋天我生半百何曾見
記是康熙丙午年

題笠山師詩卷

雨窗閉靜閱公詩風格高寒繫我思彷彿當年無相寺

杖人同聽瀑泉時

笠公為浪杖人首座

夢與施愚山論詩醒而有作

我所懷人各一方惟君譚藝最難忘其中妙訣無多語
只有銷魂與斷腸

屏間題句

著書每日有功程客至能無輟筆迎笑語多時妨正業
惟蘇不覺管人情

題郝羽吉振衣千仞圖

梧竹荒涼鳳鳥饑沙鷗汀鷺一羣飛誰知此老胸中異
千仞岡頭獨振衣

從弟既平以詩草就正題此

愛汝文心秋水明近來詩律更多情即如倒影中流句
一幅元人畫不成

既平十五日觀渡未句美人爭向江頭立不惜全身影倒垂

過西華門

碧瓦曾無一片遺黃扉猶有舊時基河干野叟低頭立
知是周人咏黍離

題友人瘦馬圖

天寒遠放雁為伴日莫不收烏啄塔杜陵此句真淒絕
見爾沈吟亦自傷

桃花村戲答閻古古

桃花村口路三叉雙塚新阡司寇家只許桃花笑人耳
遊人誰敢笑桃花

雨中漫興

節近重陽多雨天荒厨似欲斷炊煙客中何物加餐飯
茭白蕪青幾箇錢

題鍾廣漢詩冊

惠我新詩見一斑雄才麗藻動人顏他年漸老歸平淡
知在高岑伯仲間

題兩凡上人像

吟咏久無洪覺老丹青尚有巨然師空林抱膝知何事
正是經營慘澹時

法華寺古蹟

以上丁未年作

顏公千祿書全廢獨有山中四字存稍減神情因刻畫
不磨風格自高騫

蘇公作郡才三月山水間詩苦不多曾上此山觀震澤
僧寮猶有七言歌

寄懷葉子羽長興

名酒無如下箸多也曾露醉不重過雙鳧何日來茗上
山月湖風雜棹歌

送曾止山登舟

日日河干買去舟知君未去不曾愁今朝解纜真成別
腸斷茗溪春水流

荅程弘執送葛粉

念山續集
衰年病肺酒爲魔止酒其如愁思何多謝情人饋仙藥
解醒仍不廢微醺

羅鏡菴歸舟有巨魚躍入載至太湖放之乞詩
滿地江湖多釣船遊魚那得保重淵知君慈愛能生物
特地投身意可憐

李雲田乞姚氏女畫竹寄其室寶鐙并屬予爲題

小詩

楚客懷歸歸路難先將墨竹報平安君如粉籜隨風遠
妾似霜根抱石寒

陵陽山三絕句

是日蘇凝之招同王各仲
時與桂次白姚彥昭共遊

黃鶴池邊黃鶴去白龍潭上白龍飛遊人何處尋仙跡
只有丹臺與釣磯

寶公遺像居然在道院惟餘一跛僧不是蘇耽有仙骨
誰能領客上峻嶒

茗飲先烹石罇泉陵陽丹溜古來傳何當汲取三千斛
一洗今人滿腹毒

友人席上戲爲俳體

魚龍鷄鳳菜靈芝旅食將何饜菜頤猶喜山中豚肉賤

家家解作叔和醫

俗傳王叔和麻訣左心小腸肝膽腎
右肺大腸脾胃命石埭請客強半是

戲之

石埭紀遊十二首 各有序

猷州城○石埭在秦以前爲古猷州其城近陵陽

東麓隋唐間江東大亂衆推左難當爲山砦總

管據猷州城保障一方則唐時古城尚在今廢

矣。基址周遭隱隱，可見居民耕者常得古銅鐵云。

陵陽山下稻花秋，南陌東阡自一丘。聞道沈沙多折戟，老農知是古猷州。

陵陽山○秦始皇立郡縣，茲邑爲陵陽。以其近陵陽山而得名也。山在縣治之北一里外。漢元封間，沛人竇子明作令於此，嘗釣於澗，谿得白魚，似龍，剖其腹，有方書。子明喜曰：「此吾志也。」遂登茲山，結茅以居，修煉如法。三年，丹成，有白龍下降，負之而去。

鸞鶴騫飛向碧空，如何作吏入樊籠。古人亦有同心者，梅福王喬與葛洪。

丹泉○陵陽山之中峯有仙壇宮，宮上一里有丹臺。丹竈卽子明修煉處。陰晦之夜，嘗見火光燭天，疑丹之餘輝也。臺下有丹泉，從石罅涓涓流出，雖大水旱不盈涸，其味甘冽，迥異他泉。郭璞遊仙詩云：「陵陽挹丹溜，卽指此。」

丹竈千年尚有神，子明而後更無人。天生丹溜誰來飲，飲者還推郭景純。

舒谿○古名澗谿，其義未詳。東漢有舒氏三女，從其父采薪谿上，忽見大桃自澗流出，三女剖而分食之，俄頃坐化。父奔告於家，再來則三女冉冉雲端矣。遂改澗谿爲舒谿。舊有舒姑廟在谿上，今尚存。

一灣春水漾晴沙兩岸居人數十家谿上重尋仙女廟
門前依舊碧桃花

白龍潭○在舒谿之東一里許下有溪潭其色凝
碧礮石峩然獨出潭上卽子明垂釣處也李太
白詩杜鵑花開春色闌人歸陵陽釣魚晚是時
石埭屬涇縣故太白此詩在涇縣東亭作

上下山谿俱涉灘惟餘此地獨溪寒其中或有龍孫在
無復仙人把釣竿

黃鶴池○在陵陽中峰之麓方廣一畝四時不涸
相傳子明之弟子安亦仙也曾騎黃鶴來訪其
兄暫棲於此故名李太白詩白龍降陵陽黃鶴
呼子安卽用此事或云子安葬於山下有黃鶴
巢其塚樹非也池上有黃鶴墩當因池得名俗
稱白鶴墩亦非

黃鶴池邊黃鶴墩誰騎黃鶴下松根仙人一去無消息
只有羣鴉噪晚村

長林○在舒谿之東南一里古有長林街唐杜牧
守秋浦有妾程氏不爲其妻所容遣嫁於長林
杜筠甫六月而生子卽杜荀鶴也少攻詩舉景
福二年進士第世爲長林人不復歸京兆矣牧
之集有示阿宣詩云一子崑崙跨相門宣乎須
記若而人長林管領閒風月曾有佳兒屬杜筠
蓋阿宣牧之長子欲其知有此派在長林也
文采風流杜牧之桃花曾誤十年期桃根又屬他人手

稍喜還生姓杜兒

牧鴨湖。在縣西十五里之四都相傳荀鶴少時寒微曾牧鴨於此故名

荀鶴詩名冠晚唐小時牧鴨意淒涼乘軒何不歸京兆想是依依戀北堂

迴驢嶺。在牧鴨池之東一里相傳羅隱聞荀鶴能詩騎驢訪之至嶺而遇荀鶴相與定交不復至湖上故名

江東羅隱本豪賢却肯窮鄉訪少年可見詩人難再得騎驢牧鴨總堪傳

魚龍洞。在縣西三十里之六都有魚龍山山下有溪洞流水出焉遊人操小舟秉燭而入其上爲石屋左右皆石巖千年石乳纍纍下垂有如柱如屏如牀如水簾者有如鐘如鼓如磬者如松如桂如荔支如娑羅樹者如鰲如鯨如馬如鸚鵡者奇形怪狀酷似其真相傳其水發源於青陽之梅宕山伏地行十餘里始出今且人行三四里則有石坡石臺可以環坐飲酒前有石門僅容小舸門內則峭壁深潭杳不可測遊者懼不敢復入

古洞透迤十里餘深潭疑有老龍居天工亦解兒童戲幻出真形畫不如

轆轤石。在城南儀鳳門外危灘急流之處相傳邑有賢人出則夜聞轆轤之聲以爲先兆宋丁

公黼王公鉉明李公廷璋吳公必顯畢公鏘蘇
公瓊桂公伸釋褐之年皆有此兆邑人於谿上
作轆轤亭歲賓興則祭之亭今廢而址猶存
危灘靜夜轆轤聲知有英賢此地生可惜世人勤禱祀
沾沾只是爲科名

三埭石○在縣西一百六十里之十三都有三巨
石橫亘谿上以塞璉谿鴻谿之水曰上埭中埭
下埭中埭之石方廣五丈可坐百人三國時特
作石埭塲於此以屯鹽梁大同元年改爲石埭
縣自是不復名陵陽矣

縣名石埭義如何三石爲梁永不磨我欲往看愁路遠
居人老亦未曾過

九華道中

雲峰咫尺興飛騰炎暑攀躋恨未能直待秋涼重命駕
吟身須躡最高層

題石開上人所藏無道人畫

秋浦曾來藥地禪爲公秃筆寫林泉暫時不肯輕拋却
掛在松窗十二年

東龔仲震

時寓河房與
吳庭發隣

青谿僑寓已三遷垂橐仍無買酒錢幸有吳郎共晨夕
閒看秋水過霜天

送行脚僧

開堂付拂渾無賴不借軍持自有情極目江天路空濶
方知孤鶴是前生

上巳東王左車

以下戊申年作

莫愁湖上水初平
孫楚樓邊草漸生
幾欲出城修禊事
却嫌風雨太無情

哭胡吉甫先生

行年八十八春秋於世儵然無一憂
獨惜白頭逢喪亂
黍離麥秀不勝愁

三藏菴見陳百史遺墨有感

慕見僧房大幅懸
回思三十五年前
斯人雅志千秋事
僅僅科名亦可憐

崇禎癸酉予與百史結盟此菴故云

張玉書橫潭冊子

聞說橫潭別業存
桃花流水自成村
明年倘發西泠櫂
定欲停舟扣爾門

題徐子能小像

何幸同生壬子年
苦吟端不讓前賢

子與子能皆壬子生前賢柴桑少陵

香山亦壬子生獨子鬚白君鬚黑
才命雌雄已判然

題畫寄桃源令魏公

淮河交處少山林
花縣新彈宓子琴
為寄郭熙圖一幅
千巖萬壑助琴心

贈汪少室四絕句

櫻桃時節雨偏多
陋巷柴扉客不過
倏有素冠亡友子
矯如白鶴下庭柯

絕世聰明管輅年
懷中詩草更翩翩
自言酷好念山老
衝口能吟數十篇

爾祖司農受國恩
先朝廟諱合知尊
如何輕犯 光宗

諱想是髫年未討論

嵩高三十六峰齊太室居東少室西汝字重更應取此

白頭猶記在青谿

少室各嵩舊字洛公子以
其犯廟諱也爲改今字

訪王子言秘書畱飲竟日有贈

朱雀橋邊谿水平畫船簫鼓雜歌聲不知何處金閨客
高咏臨流聽者驚

曾去天都陟翠微重來京國玩芳菲眼前冠蓋應無數
獨念僉山老布衣

野夫白首臥江村懶慢經年未出門今日杖藜來水閣
懽然談藝到黃昏

題高翁小像

家在秦淮水閣居蘭花蓮葉滿堦除捲簾時看人垂釣
欹枕夜聽兒讀書

贈江天章

傳神自昔推曾老波妙手如今讓戴生澁復有江郎工
此技三人異代合齊名

趙山子齋頭看沈石田畫

質蹟無非沈石田此圖山水是真傳主人欲售我欲買
安得青銅三萬錢

重題採藥圖

白柄長鑿手自持花籃盛藥步行遲眉端尚有英雄氣
二十年前四十時

秋夜示內

竹院風聲吹破壁紙窗鐙影照空鐔今宵愁絕應難寐

欲飲借卿頭上簪

汪我生家有婢肥白而眇年二十餘尚無偶一日
有眇丈夫見而悅之持厚幣取去予適逢吉期
戲爲俳體

昔有人耽一目妓翻嫌兩目是多餘情知今夜銀鐙下
合香真成比目魚

重陽後一日徐仲光送酒

斗酒雙鳧誰餉君君還餉我意殷勤獨憐不及重陽節
把盞同看谿上雲

偶過朱槐里齋頭因題其小像

論交三十二年前對酒吟詩壁尚縣我望六旬君望八
白頭相遇更歡然

破册繡緹誰寫真品題俱是宋遺民傳之異代同心者
想見西臺慟哭人

爲張僧持五十初度

南邨五十負詩名詩似梅花徹骨清借問天街騎馬客
幾人能作苦吟聲

自小長齋繡佛前獨餘米汁未能捐城南四百八十寺
一寺畱君住一年

上河守風邂逅江天申懽如故舊邀飲江樓而張
南邨適至遂成大醉詩以紀之

小艇初維江岸沙忽逢年少有才華問予可是龔山老
不惜千錢付酒家

欲挂風帆恨石尤借君杯酒可忘憂無心又遇南邨子

爛醉旗亭卽勝遊

桃花潭懷古

太白常遊涇水濱交遊寧止一汪倫歸時獨爾來相送
千古令人思此人

題龔半千畫贈曹明府

龔生墨妙冠江東曾寫雲山艸閣中今日石門尋茂宰
林巒真與畫圖同

黟縣夜酌

石盂山下雪花飄旅舍將何破寂寥惟有城南雙料酒
一瓶差可度寒宵黟縣所沽惟白酒
名雙料者頗佳

將之無錫別王壻安節以下巳酉年作

春風挂席向梁谿今夜維舟泊水西惜別漫勞畱我宿
榜人恐不待聞鷄

過弘濟寺不得上岸訪蒲菴師寄此

言登江岸訪蒲公却恨舟師趁好風纔得過江風又息
幾回搔首夕陽中

江上觀水勢因憶程孟陽有三月春愁水不如之
句遂用其語作起

三月春愁水不如眼看春水更愁予何年飽食無遊事
堅臥茅齋老著書

錢湘霽屈翁山鄒訐士寧山同古白上人見過艸

堂小飲因至晏家橋看罌粟花得七絕句

長板橋頭春水波舞衣歌扇總消磨獨餘野圃閒花艸
勾引東風蛺蝶多

玫瑰芍藥本妖嬈罌粟花開色更嬌古寺舊爲江令宅
小園今在晏家橋

笑指城南富貴家朱門寂寂鎖煙霞不如老圃多幽趣
常許閒人來看花

艸堂臨水淨無塵菜甲盈畦別有春閉戶不曾延俗客
看花時復過比鄰

自歎貧家召客難客來寧不薦杯盤典衣沽酒亦成醉
甜笋香芹未覺酸

花落鶯啼春可憐酒徒相遇發狂顛諸君莫笑予頭白
我是花中老少年

水閣紛紛颺酒旗山厨往往斷朝炊枝頭無數米囊子
戲語錢翁轉自悲

方龔山先生傳

宿松朱書紫麓

方文字爾止一名一耒字明農桐城人方氏世以忠孝
節義名其家自四川斷事官法死靖難之禍數傳至學
漸講學稱明善先生學漸生大鉉以進士仕戶部主事
立氣節能文章卽文父也年五十生文文七歲父卒京
邸其母王氏年二十餘苦節撫成之文年少有才名思
振其家聲與諸名士貴池吳應箕輩及復社幾社諸君
子相厚善崇禎十五年大荒乏食宣城令梁應奇以五
百金贈之乙酉後輒放廢不自繩檢避兵吳江尋病困
白下武進令張國樞高淳令崔掄奇濟其急旣而太湖
令李世洽延爲生徒師遂徙家焉文爲人猥狹又任放
好嫚罵刻意爲詩輒嫉憤舉世世無當其意者以故多

玫瑰芍藥木妖嬈罌粟花開色更嬌古寺舊爲江令宅
小園今在晏家橋

笑指城南富貴家朱門寂寂鎖煙霞不如老圃多幽趣
常許閒人來看花

艸堂臨水淨無塵菜甲盈畦別有春閉戶不曾延俗客
看花時復過比鄰

自歎貧家召客難客來寧不薦杯盤典衣沽酒亦成醉
甜笋香芹未覺酸

花落鶯啼春可憐酒徒相遇發狂顛諸君莫笑予頭白
我是花中老少年

水閣紛紛颺酒旗山厨往往斷朝炊枝頭無數米囊子
戲語錢翁轉自悲

方龔山先生傳

宿松朱書紫麓

方文字爾止一名一耒字明農桐城人方氏世以忠孝
節義名其家自四川斷事官法死靖難之禍數傳至學
漸講學稱明善先生學漸生大鉉以進士仕戶部主事
立氣節能文章卽文父也年五十生文文七歲父卒京
邸其母王氏年二十餘苦節撫成之文年少有才名思

吳應箕輩及復社幾社諸君
荒乏食宣城令梁應奇以五

卷之二 七言律 八首 廿三頁 缺
又缺 四 續 卅 三 首

百金贈之乙酉後輒放廢不自繩檢避兵吳江尋病困
白下武進令張國樞高淳令崔掄奇濟其急旣而太湖
令李世洽延爲生徒師遂徙家焉文爲人猥狹又任放
好嫚罵刻意爲詩輒嫉憤舉世世無當其意者以故多

齟齬四人獨能終始禮之無間也間登廬山南望痛哭
還居樅陽會妻中風暴死妻家構釁移禍其妾坼妾腦
隋胎死時母年七十矣命文出遊繼室與生子延宗祀
文依母不肯去母嚴命之乃之淮安已聞母卒奔還厝
之淺土事竣遊徐州入燕北探孤竹諸貴人多折節交
之文顧時時狂罵曰齷齪毋近牀汗我逾年復命棹歸
卜居淮上娶故殉難汪公偉女爲婦時李世洽觀察徐
州復往從之已乃南入杭州縱遊西湖還居金陵以醫
卜自活尋遊兗州謁曲阜林廟去之濟南上泰山西赴
廣平大名還金陵未幾沂江入豫章至贛州還有四遊
詩集壬寅益憤激若蹙蹙不能一日生者過清江浦讀
共武所封河伯廟碑慨然酌酒呼謝處士緒吾與爾爲
後起不孤也痛哭去謝處士緒者宋會稽諸生居金龍
山入元以忠憤自沉卽洪武所封河伯者也事詳廟碑
文去復上泰山還客常州或出或居戊申謁孝陵先是
文從兄孔炤爲南尚寶司攝太常寺秋祭攜文及其子
以智同至齋宮夜有羣鹿來觸人項懸金牌鉞永樂字
其上蓋成祖所放也取餅餌飤之卽馴擾攸伏雞鳴鼓
鐘百官鵠立拜舞文因縱觀其盛心樂之遍陳禮樂器
物復嘆其朴儉謂聖制不可及至此忽三十年都非往
日見聞文曰戊申高皇帝登極之年也嗟乎哀哉伏地
大哭不能起久乃去明年歿于蕪湖客舍有爲箕仙之
術者或傳箕曰平生詩酒是生涯老死江干不憶家自
入黃泉無所見冥官猶是舊烏紗遠近傳之以爲文也

文無子其婿安節王槩爲刻命山詩若干卷命山在懷遠縣城外周世宗望之謂濠州有王者氣文以自號不忘濠也

朱書曰吾聞之吳人汪撰曰陳溧陽以假歸乞命山定其詩執禮甚恭命山反復讀之曰甚善但須改三字卽必傳無疑耳陳以爲隱也曰寧止是顧三字者何也命山厲聲曰但須改陳名夏三字時坐客滿舉錯聘不能出聲陳亦厲聲曰爾謂我不能殺爾耶適代巡來謁陳拂衣去客咸咎命山命山笑曰吾自辨頭來耳公等何憂頃之陳復入執命山手涕流被面曰子責我良是獨不能諒我乎竟相好如初